



T 3205/1129 85

2





Faint header text at the top of the left page, possibly bleed-through from the reverse side.

Main body of faint, illegible text on the left page, organized into vertical columns within a grid.

Blank page on the right side of the spread.

元和縣志卷三

城池

湖縣之未立也蘇郡城長吳兩縣分治之城也
今既建元和析置土地則金城湯池處三之一
矣自臥龍街南登城歷葑門婁門迄於范杞梁
灣廣袤一十八里自當堅垣墉固吾圍况吳爲
江南大都會東瀕海西臨太湖水陸之衝南北
舟車雲集將所稱申畫郊圻慎固封守者尤綦
重焉爲邑長者可不知保障之責之有所歸乎

哈佛大學漢和
圖書館珍藏印

雉堞之多寡樓櫓之堅瑕壁壘之高卑厚薄濠塹之深淺廣狹脩禦之有地濬築之有時布諸方策庶守土者察之盡職焉志城池

元和縣隸蘇州府與長洲縣吳縣分治郡城吳治城西長洲治城東元和析長洲立縣則又東焉城有六門元和轄者二曰婁在東北曰葑在東南其在北者曰齊門則長洲所轄也在西曰閶門胥門在南曰盤門吳所轄也元和界自臥龍街南登城由葑門歷韓家浜過婁門至范杞梁灣一十八里雉

堞凡一千一百一十八合計之城爲亞字形周四十五里五十三步高二丈八尺女牆高六尺厚一丈八尺自閶門南至胥門六百三十九丈五尺自胥門南至盤門三百八十八丈七尺自盤門東至葑門一千一百一十八丈自葑門北至婁門八百六十四丈二尺自婁門北至齊門五百八十丈自齊門西至閶門八百九十二丈二尺五寸總計四千四百八十三丈六尺五寸爲一萬二千二百九十三步九分南北一十二里東西九里五門各有

水關惟胥門闕焉城樓六座旗臺三座胥門姑蘇臺一座敵臺五十七座堞頭三千五十一個軍器庫房六所官廳六所窩舖一百五十七間營房每門六間其鎖鑰則掌于總捕同知此今之規制也而自古以來之沿革則詳錄于左脩觀覽焉

吳泰伯築城梅里在今無錫境諸樊始徙都于此唐陸廣微吳地記云闔閭城周敬王六年伍子胥築大城周廻四十二里三十步小城八里二百六十步陸門八以象天之八風水門八以象地之八卦

吳都賦云通門二八水道六衢是也西闔胥二門南盤蛇二門東婁匠二門北齊平二門不開東門者爲絕越之故也

按城門之號見春秋吳越者惟闔蛇望齊越絕書作闔胥盤蛇婁匠齊平而葑赤不與續經作盤蛇闔胥婁葑將齊而赤平不與今從吳地記隋楊素徙城橫山東卽今所謂新郭也

唐武德九年復還舊乃分城之東置長洲縣以臥龍街爲界自闔閭始造歷一千八百餘年附郭止吳

邑嗣是以後則長吳分隸焉時遇王郢之亂刺史張搏重築之八門悉啓雉堞稱雄

梁武德二年始以磚甃高二丈四尺厚二丈五尺裏外濬濠

宋初門塞其二惟胥閭盤葑婁齊六門後胥門亦廢政和中復修治之其故廢塞者皆刻石爲識宣和五年詔加重甃建炎間遭兵燹淳熙中郡守謝師稷又繕完之至開禧間隕圯殆半而城隍亦多爲菱蕩稻畦侵齧時史彌遠爲常平圖復之嘉定十

六年彌遠在相位遂奏請得賜錢粟郡守趙汝述沈皞相繼修治爲一路城隍之最寶祐二年趙汝述增置女牆補建葑婁齊三門樓開慶元年詔復增修景定末風壞婁齊二樓咸淳初重建

元定江南凡城池悉命堙毀雖設五門蕩無防蔽至

正十一年兵起詔天下繕完城郭郡守高履築壘

開濠還闢胥門

掘土姑蘇驛下得石鐫胥門二字乃重闢之

城高二丈

三尺下地累石三層加以大甃凡厚三丈五尺面廣一丈六尺仍甃巨石爲水溝每門上建戍樓下

作娥眉甬道周廻夾以長濠視昔有加焉

明平張士誠更加修築倍為高廣嘉靖末汪直勾引東寇掠擾江浙同知任環修治城堡以嚴防禦崇禎間流氛四起詔飭修練儲備知府陳洪謚署長洲事牛若麟設法整修

國初巡按御史秦世楨修葺各門樓櫓重建閫門釣橋康熙元年巡撫韓世琦復建官廳軍器庫于六門增置舖舍規制具舉其雄峙如百二河山焉

婁門東門也以直臻婁縣而名吳地記云本號膠門

秦時有古膠縣及漢王莽改為婁縣范志云今崑

山縣東北三里許有聚落尚名婁縣

葑門東南門也續志云吳有葑田謂茭土膠結可以種植者故名或謂之封門取封隅義國語韋註云封山隅山在吳郡永安縣又名鱒鮓門史記子胥傳註云越開示浦子胥以濤蕩羅城開此門有鱒鮓隨蕩入故名門常堙塞范文正公守郡闢之

按二門元和所轄也舊仍有赤門蛇門匠門亦元和分地赤門在盤葑二門間以南方屬火故

名今南城下有太溝外濠之水從此入祝橋以入于燕家橋卽赤門水道也蛇門在巳方因以爲名吳越春秋云吳地在辰其位爲龍故於城南門上反羽爲兩鯢繞以象龍角越在巳其位爲蛇故於南大門上置木蛇北首向內示越屬吳也吳地記稱漢梅福爲南昌尉避亂易姓名隱吳門爲市卒此吳門在江西記附會也匠門在葑婁之間又名干將門闔閭使干將於此置冶鑄劍故名今有匠門塘直東有歐冶干將墓或省稱曰將門三門皆久廢

元和所隸者二門其外則有閶門胥門盤門屬吳縣齊門及舊平門屬長洲閶門名象天門通閶闔風也闔閶欲破楚在楚西北故立閶門以通天氣吳地記云亦號破楚門吳伐楚大軍從此門出陸機詩曰閶闔勢嵯峨飛閣跨通波孔子登山望東吳歎曰吳門有白氣如練今置曳練坊及望舒坊因此胥門一名姑胥門越絕書云外有九曲路闔閭從此遊姑胥臺以望太湖

蓋取姑胥山爲名也宋紹興中作驛館其上亦號姑蘇臺祥符圖經云子胥家于此後抉目懸于門故名盤門吳地記云古作蟠門嘗刻木爲蟠龍以鎮越也又云水陸相半縈迴屈曲故名盤門齊門吳越春秋云闔閭十年旣破齊齊以女爲質吳爲太子波聘之齊女少日夜號泣成疾闔閭乃造北門令女往游其上因名曰望齊門平門一名巫門吳地記云平門水陸通毘陵子胥平齊大軍從此出故號平門今有平門城

一云巫咸所葬故

又號巫門今廢以上諸門不

統于元和然同城

城也宜附錄焉

元和縣志卷四

公署

公署者臨民之地政教號令之所從出也舊制
高其閘闕厚其牆垣豈徒飾觀云爾哉蓋不如
是不足以示森嚴昭體統也周禮以八法制官
府鄭鍔注謂百官所居曰府唐房琯歷慈溪宋
城濟源諸縣令所在緝治解舍良有以也况元
和析地郡城解舍翺新規模制度非仍舊貫者
比烏可無書若城中有大中丞行臺有織造府

有布政使司有蘇松太巡道署有蘇州府長洲
吳縣署有城守營游擊守備署有撫標中軍游
擊守備署雖同城而地非所轄故不備書書其
在元和境者於左志公署

雍正三年江寧巡撫張楷題請蘇松常三府屬
太長等十三州縣各擇公所建設官署所有長
洲縣新分之元和縣議將原任蘇州織造李煦
案內孔夫子巷入官房屋一所改造咨明工部
飭行在案雍正四年八月元和縣紳士尤珂等

呈稱孔夫子巷入官房屋改建縣治街巷褊窄
房舍卑狹庫藏監獄勢須另買民房添造所需
工價費用煩多現有十郎巷陳姓房舍地處高
平規模寬廣估計價值改建縣治於國計民生
均有攸賴等情到縣本縣知縣江之煒據呈通
詳業經前後覆核公議妥洽雍正五年十月二
十五日江寧巡撫陳時夏彙題前事十一月二
十日奉

旨該部議奏本月二十一日抄出到部該工部等衙

門議得江蘇巡撫陳時夏疏稱長洲縣新分之
元和縣應建衙署先經議以原任蘇州織造李
煦案內入官房屋改造緣係年久傾圮勢須拆
建兼之地處窄狹必得另買民房添造庫獄所
需工費價用繁多經臣咨部請買十郎巷陳姓
民房改建部覆應令具題到日再議等因隨行
布政司遵照覆今據布政使張坦麟詳稱李煦
案內官房實緣年久損壞勢必拆卸改造工價
與房價費至六千餘兩之多今十郎巷陳姓民
房規模宏敞堪爲改建其監獄庫舍不用另買
民房拆造一切工費止需三千餘兩不特催科
聽訟可免擁擠而庫藏獄囚皆歸謹密民情稱
便等情臣查元和縣衙署旣據請買民房改建
所有李煦案內入官房屋應聽本案覓售變價
歸結臣謹會同署督臣范時繹合詞具題等因
前來查元和縣應建衙署該撫旣稱李煦案內
官房寔緣年久損壞勢必拆卸改造工價與房
價費至六千餘兩之多今十郎巷陳姓民房規

模宏敞堪為改建一切工費止需三千餘兩不
 特催科聽訟可免擁擠而庫藏獄囚皆歸謹密
 民情稱便所有李煦案內入官房屋仍聽本案
 覓售變價歸結等語應如該撫所請准其另買
 十郎巷民房改建元和縣衙署工竣之日將實
 用過工費銀兩脩造清冊題銷至李煦入官房
 屋亦應如所請仍聽本案覓售變價歸結可也
 等因雍正五年十二月初九日題本月十一日
 奉

旨依議

縣令治堂解

大堂三間

理民聽事所

露臺一座

前立戒石

兩翼書

辦房共十間

皂隸房六間

儀門五間

迎賓

館三間

大門三間

八字牆二堵

照牆一堵

已上俱堂以外

川堂三間

東西庫房四間

宅門一

間 走道二間

內廂房六間

三堂五間

樓

五間上下共十間

廂樓上下共四間

庫門一

間 庫門後廂樓上下十八間

上房大樓十間

大樓下房五間 走廊九間 花廳三間 花

廳西首一間 花廳前廂披共四間 書房四間

東西廂房四間 書房東首下房三間 後書

房三間 書房左首走廊二間 內房八間 廚

房庫房下房共一十六間 已上俱堂以內

糧衙衙署

大門一間 大堂三間 堂後一間 皂房二間

土地祠一間 門房一間 上房六間 下房

五間 廚房一間 側披一間

捕衙衙署

大堂三間 書門房皂共二間 儀門三間 大

門一間 已上俱堂以外 二堂五間 上房五間 廚房

三間 已上俱堂以內

禁房

虎頭門一間 禁班房一間 蕭王堂三間 更

房一間 官廳三間 監房十五間 監內衙道

六十丈 監外圍牆五十丈

元和縣志卷四

元和縣志卷五

學宮

曾子固云古人自家至於天子之國皆有學自
幼至於長未嘗去於學之中舉凡人之起居飲
食動作之小事及於修身爲國家天下之大事
皆自學出而無斯須去於教則學校之設不可
一日而荒也審矣元和立縣凡城池疆域山川
田賦戶口無不與長洲分惟學宮獨與長洲共
者匪簿書期會之是急正急於端士習而明教

化也蓋先師廟貌宜輝煌門序正位講藝之堂
宜闕敞擇地鳩工經營匪易而春秋釋奠及詩
書六藝弦歌討論之事皆不可以姑待如必俟
新廟落成始命師儒進髦士聲鼓鐘陳俎豆習
威儀長器識範竒袤豈所以宏宣德意哉茲以
教諭教長洲以訓導訓元和學宮則仍其舊誠
明於緩急之數而教之不可以不先也宮墻肄
業之所當新者次第興焉則長吏之責其何敢
怠志學宮

學宮建置雍正三年十月析長洲地建元和縣因卽

長洲縣學宮更其榜曰長洲元和縣學教諭仍司

長洲學事改訓導爲元和訓導司元和學事蓋教

化不可緩分建將有待也攷長洲縣立於唐萬歲

通天二年初亦未有學附于府庠曰麗澤齋宋景

定三年制詔天下縣設主學用丕儒教時宋楚材

以選至嘆曰官以主學名而居無廬士無廩師倚

席不講可乎乃請于太守陳均卽廣化寺改建焉

在今府治東北講堂曰禮堂

魏文靖公篆

四齋曰富文

貴德廣業博學

有兩浙西路提點刑獄公事俞琰記

因企慕范文正

公又建景文堂

有通判平江軍府趙與鑒記

此長洲立學之權

輿也尋毀元初邑令改驛舍為孔子廟大德六年

縣徙麗郡治因移驛材構學於縣治故基郡人前

徽州路教諭陸德原謂其隘陋欲傾家剏建之縣

長元童以禮勸贊乃予至元再元之三年鳩工庀

材築長垣前起禮殿廣庭穹門翼以邃廡後為兩

齋倫堂庖湍以次興舉凝土為先聖四侑十哲像

繪羣賢從祀之位置田以養士學制始備

有同知制誥兼

國史院編修官陳旅記

明洪武七年知縣宋文敏張翔闢學

門于廟右又立先賢祠祀季札韋應物陸龜蒙范

仲淹魏了翁文天祥久之俱廢成化九年巡按御

史鄭銘提學御史戴珊郡守邱霽乃拓東南地改

建焉左為大成殿夾以兩廡右為明倫堂

周伯東琦篆

西兩齋曰進德曰修業

有夏時正記

正德十六年知縣

郭汲建尊經閣後起土山嘉靖十五年知縣賀府

修葺增名宦鄉賢祠此長洲再立之學也

今名十舊學

八年教諭蕭文佐以此地湫隘不稱謀遷之會有

詔毀浮圖之非敕建者僉謂城東福寧寺應毀文
 佐乃率諸生李子純文嘉李禴葉鶴年蘇獻可盧
 化承請于撫按提學皆可之以海寇寢十九年知
 縣吳世良至與諸生議合乃復請于巡按御史舒
 汀汀躬詣寺閱視而默與知府王廷相規度仲冬
 舉事廢福寧寺為學宮則今兩縣之合學也有朱
記其制左廟右學各有門門前為起鳳街樹緯楔
 曰萬代宗師拱照櫺星門街東為外泮池跨池為
 梁曰升龍池南築墻曰萬仞宮墻拱照學門東為

玉帶橋聖域坊西為茂苑橋賢關坊廟由櫺星門
 入重以戟門而中為先聖殿殿之旁兩廡列焉學
 由儒學門入重以禮門中為明倫堂堂後為事友
 軒堂東為進德齋西為修業齋齋南北為號舍東
 舍後有小徑二一折而北為名宦祠一折而北過
 飛虹橋為鄉賢祠二祠久圯今建廟東西舍後為射圃中有
 觀德亭廟學之間有夾道由夾道北折而東為先
 師廟後為啓聖祠今名崇聖祠祠附禮樂三庫自右入
 迤北為尊經閣閣後有土山構道山亭其上遵山

徑而北有橋曰望闕跨玉帶河東爲蔬圃稍西爲桃李園由園而北而西聚太湖石壘小山建敬一亭由尊經閣而東爲會饌堂又東爲俸廩倉折而北有岐路一南行通東夾道一東行爲跨玉橋過橋北折爲遊息所又北爲杏花村嘉樹館有橘數十株南折而東有小池池有桂跨池之橋曰折桂過橋屋數楹藏宋元以來石刻後有土山松林蒔雜花數十株名春宴園又東蒔竹數百竿名小淇園蓋玉帶河以東之地盡於此春宴園北至遊息所東有田數畝可供粢盛玉帶河東南之境也所謂玉帶河者由東南外河入直北貫跨玉橋折而西經游息所前尊經閣後踰望闕飛虹兩橋而出外河以其環紆如帶故名三十二年巡按御史徐洛修四十三年知府徐節再修隆慶二年知縣周良臣教諭李國珍于學門內建騰蛟起鳳塞門種栢二百株六年巡撫陳道基又修開內泮池徙學前民居去升龍橋改聖域坊爲興賢坊賢關坊爲達材坊巡按劉日睿知府吳善言知縣陳用賓教

元禾縣志 卷五 五
諭周安叔協理興修萬歷十七年巡按李堯民輸
二千金建升龍橋于東南濬玉帶河移建萬代宗
師坊及敬一亭創聚奎樓土地祠築萬仞宮墻巡
撫周紀知府石崑玉同知王典知縣陳具志教諭
吳良治訓導周養中捐鍰助理

國朝順治十一年督學國史院侍讀石申捐俸修葺
未竣事教諭王瑀踵修未幾有鎮帥居之殿堂僅
存兩廡啓聖祠尊經閣道山亭悉爲荒土康熙二
十一年翰林院侍講彭定求時官修撰爲文告先

師倡捐金錢在京募于同籍家居告之當事維時

巡撫余國柱暨監司守令各有助委教諭姚焱訓

導王珍率諸生鈕希文重建兩廡及明倫堂櫺星

門而餘猶未備布政使丁思孔有記三十二年啓聖祠始成

蓋定求重行勸募荏苒數載時勢多阻因視舊址

稍縮數武乃克卒工彭定求有記四十四年定求導善

士馬俊捐金一千七百兩建尊經閣閣五楹擬置

經籍藏其中又導建道山亭古木喬蔭清流潔洄

講業之餘相與游泳令人作春風舞雩之想彭定求有

記 雍正五年元和縣知縣江之煒長洲教諭鄒增
 元和訓導孔傳燾又募修正殿先師廟五楹奉
 至聖先師孔子神位上懸

聖祖仁皇帝御書萬世師表及

世宗憲皇帝御書生民未有扁額座前石碑二為

聖祖仁皇帝御製孔子贊四子贊左右列四配神位

東配 復聖顏子 述聖子思子

西配 宗聖曾子 亞聖孟子稍後列十哲神位

東哲先賢 閔子 冉子 端木子 仲子 卜

子

西哲先賢 冉子 宰子 冉子 言子 顓孫

子康熙五十一年二月大學士九卿奉

聖祖仁皇帝上諭朕自幼冲卽好讀書亦好寫字一切

經史靡不徧閱成誦在昔賢哲所著之書間或字

句與中正之理稍有未符或稍有瑕疵者後儒卽

加指摘以為理宜更正惟宋之朱子註明經史闡

發載籍之理凡所撰釋之文字皆明確有據而得

中正之理今五百餘年其一字一句莫有論其可

更正者觀此則孔孟之後朱子可謂有益于斯文厥功偉矣朕既深知之而不言其誰言之朱子宜如何表章崇奉爾等與九卿會同具議以聞于是大學士九卿公同集議仰惟

皇上統紹勳華道宗鄒魯禮明樂備治定功成勤勞萬幾間有餘暇手不釋書心惟志學躬聖神文武之德契濂洛關閩之傳

賢翰親題昭文明于天壤

雲章永煥樹儀表於人間彰顯遺徽甄錄嗣裔旣光

前而耀後洵振古而超今而尤于朱夫子之全集

沈潛研究寔踐敦行嘗謂朱夫子發明聖道軌于

至正高不入于虛無卑不雜于刑名使六經之旨

大明聖學之傳有繼孔孟以來爲功宏鉅今

特諭臣等會議優崇之典臣等謹查朱子在孔廟東

廡先賢之列相應仰遵

諭旨移于大成殿十哲之次配享先聖以昭我

皇上表章先賢之至意通行到學隨擇吉恭捧木主

升配于東哲之列位次先賢卜子兩廡列先賢先

儒神位歷朝以來各有增遷康熙二十四年奉
 旨改稱宋儒周邵二程張朱六子為先賢位次左氏
 下五十五年以學臣余正健請增祀范仲淹雍正
 三年奉

旨復祀蘧瑗林放秦冉顏何鄭康成范甯增祀牧皮
 縣亶公都子樂正克公孫丑萬章諸葛亮王通尹
 焯羅從彥黃榦陳淳魏了翁何基趙復王柏金履
 祥許謙陳澹羅欽順蔡清陸龍其凡二十八人故
 今之位次

東廡則先賢蘧瑗 澹臺滅明 原憲 南宮适

商瞿 漆雕開 司馬耕 有若 巫馬施 顏

辛 曹卹 公孫龍 秦商 顏高 壤駟赤

石作蜀 公夏首 后處 奚容蒧 顏祖 句

井疆 秦祖 縣成 公祖句茲 燕伋 樂欬

狄黑 孔忠 公西蒧 顏之僕 施之常

申枏 左丘明 秦冉 牧皮 公都子 公孫

丑 張載 程頤 先儒公羊高 孔安國 毛

萇 高堂生 鄭康成 諸葛亮 王通 司馬

學宮

光 歐陽修 胡安國 尹焞 呂祖謙 蔡沈

陸九淵 陳淳 魏了翁 王柏 許衡 許

謙 王守仁 薛瑄 羅欽順 陸龍其凡六十

二位

西廡則先賢林放 宓不齊 公冶長 公皙哀

高柴 樊須 商澤 梁鱣 冉孺 伯虔 冉

季 漆雕徒父 漆雕哆 公西赤 任不齊

公良孺 公肩定 鄒單 罕父黑 榮旂 左

人郢 鄭國 原亢 廉潔 叔仲會 公西與

如 邾巽 陳亢 琴張 步叔乘 秦非 顏

噲 顏何 縣亶 樂正克 萬章 周敦頤

程顥 邵雍 先儒穀梁赤 伏勝 后蒼 董

仲舒 杜子春 范甯 韓愈 范仲淹 胡瑗

楊時 羅從彥 李侗 張拭 黃榦 真德秀

何基 趙復 金履祥 陳澔 陳憲章 胡

居仁 蔡清凡六十一位此今之定制也

聖祖仁皇帝御製孔子贊序曰蓋自三才建而天地不

居其功一中傳而聖人代宣其蘊有行道之聖得

位以綏猷有明道之聖立言以垂憲此正學所以常明人心所以不泯也粵稽往緒仰溯前徽堯舜禹湯文武達而在上兼君師之寄行道之聖人也孔子不得位窮而在下秉刪述之權明道之聖人也行道者勲業炳于一朝明道者教思周于百世堯舜文武之後不有孔子則學術紛淆仁義湮塞斯道之失傳也久矣後之人而欲探二帝三王之心法以爲治國平天下之準其奚所取衷焉然則孔子之爲萬世一人也審矣朕巡東國謁祀闕里

景企滋深敬摛筆而爲之贊曰清濁有氣剛柔有質聖人參之人極以立行著習察舍道莫由維皇建極惟后綏猷作君作師垂統萬古曰惟堯舜禹湯文武五百餘歲至聖挺生聲金振玉集厥大成序書刪詩定禮正樂旣窮象繫亦嚴筆削上紹往緒下示來型道不終晦秩然大經百家紛紜殊途異趣日月無逾羹墻可晤孔子之道惟中與庸此心此理千聖所同孔子之德仁義中正秉彝之好根於天性庶幾夙夜勗哉令圖溯源洙泗景躅唐

虞載歷庭除式觀禮器摘毫仰贊心焉遐企百世
而上以聖爲歸百世而下以聖爲師非師夫子惟
師于道統天御世惟道爲寶泰山巖巖東海泱泱
墻高萬仞夫子之堂孰窺其藩孰窺其徑道不由
人克念作聖

顏子贊 聖道早聞天資獨粹約禮博文不遷不貳
一善服膺萬德來粹能化而齊其樂一致禮樂四
代治法兼備用行舍藏王佐之器

曾子贊 洙泗之傳魯以得之一貫曰唯聖學在茲

明德新民止善爲期格致誠正均平以推至德要
道百行所基纂承統緒修明訓詞

子思子贊 於穆天命道之大原靜養動察庸德庸
言以育萬物以贊乾坤九經之重大法是存篤恭
慎獨成德之門卷之藏密擴之無垠

孟子贊 哲人旣萎楊墨昌熾子輿闢之曰仁曰義
性善獨闢知言養氣道稱堯舜學屏功利煌煌七
篇並垂六藝孔學攸傳禹功作配

崇聖祠在聖廟之後舊名啓聖祠祀啓聖公以先賢

顏無繇曾點孔鯉孟孫激配先儒程珦朱松蔡元
定周輔成從祀雍正元年三月內閣禮部奉

上諭至聖先師孔子道冠古今德參天地樹百王之
模範立萬世之宗師其爲功於天下者至矣而水
源木本積厚流光有開必先克昌厥後則聖人之
祖考宜膺重厚之褒封所以追溯前徽不忘所自
也粵稽舊制孔子之父叔梁公于宋真宗時追封
啓聖自宋以後歷代遵循而叔梁公以上則向來
未加封號亦未奉祀祠庭朕仰體

皇考崇儒重道之盛心修崇德報功之典禮意欲追封

五代並享烝嘗用伸景仰之誠廣慰羹墻之慕內
閣禮部可會同確議具奏欽此該_臣等謹議至聖
先師孔子秉生安之至德集金玉之大成道脩一
身教垂萬世歷代雖有尊崇之禮而自啓聖公以
上封位未加祀典未脩我

皇上作君作師傳心傳道孝思不匱宏施錫類之恩
慕德無窮推廣報功之典以孔子爲百代之師晉
先世以尊崇之號特頒

諭旨追封五代並享烝嘗此誠曠古未有之異數也

臣等謹稽典禮詳考世系孔子之五世祖木金父

公自宋遷魯始姓孔氏高祖祈父公會祖防叔公

祖伯夏公父叔梁公凡五代除叔梁公應照舊封

啓聖公外木金父公至伯夏公四代皆應追封公

爵_臣等謹擬木金父公追封爲肇聖公祈父公追

封爲裕聖公防叔公追封爲貽聖公伯夏公追封

爲昌聖公卽於啓聖祠內安設神牌按昭穆位次

每年春秋致祭其牲牢酒醴籩豆簠簋每神位前

各照啓聖公例陳設其啓聖祠向係專祀叔梁公

故以啓聖爲名今

聖朝異數合祀五代擬更名曰崇聖祠候

命下之日將追封字樣通行國子監順天府直省府

州縣衛學及衍聖公一體遵行至欽奉

上諭一道應頒發國子監及闕里勒石廟庭以光盛

典其追封誥命交與內閣撰擬國子監之啓聖祠

改造扁額添設神牌祭器等項交與工部俟造完

之日交欽天監擇吉入廟其餘各省行令該地方

官各行辦理可也四月大學士馬齊等啓奏奉
上諭五倫爲百行之本天地君親師人所宜重而天
地君親之義又賴師以彰明自古師道無過于孔
子誠首出之至聖也我

皇考崇儒重道超軼千古凡尊崇孔子典禮無不備至
朕蒙

皇考教育自幼讀書心切景仰欲再加尊崇更無可增
之處故敕部追封孔子以上五代今部議封公上
考前代帝王皆有追崇之典唐明皇封孔子爲文

宣王宋真宗加封至聖文宣王父叔梁紇爲齊國
公後加封孔子爲大成至聖文宣王加封齊國公
爲啓聖王至明嘉靖時猶以王係臣爵改稱爲至
聖先師孔子改啓聖王爲啓聖公王公雖屬尊稱
朕意以爲王爵較尊孔子五世應否封王之處着
問諸大臣具奏欽此該臣等會議得明倫闡教治
世之大經崇德報功右文之盛典歷稽史冊紀載
之文皆有推尊孔子之禮

聖祖仁皇帝重道崇儒典章明脩我

皇上因心仁孝好古敏求統道法之淵源以光大爲繼述謂倫常爲百行之本原至行立萬世之師表特諭追封五代典禮已極優隆猶以公爵之尊未若王爵復降

諭廣賜諮詢

臣

等欽奉之下深服

聖裁允當衆議僉同請自叔梁公以上至木金父公凡五代并追封爲王爵謹擬追封木金父公爲肇聖王祈父公爲裕聖王防叔公爲貽聖王伯夏公爲昌聖王叔梁公爲啓聖王至入廟之日國子監

及闕里各遣大臣一員讀文祭告祭文翰林院撰擬祭品照例備辦餘俱照原議仍將追封王爵上諭一并頒發勒石可也隨通行到本學雍正二年秋如制安奉并復以先儒張廸從祀明倫堂五楹屏門書大學聖經一章雍正五年元和縣知縣江之煒恭製扁額敬書

聖祖仁皇帝御製訓飭士子文懸于正中其詞曰國家建立學校原以興行教化作養人材典至渥也朕臨馭以來隆重師儒加意庠序近復慎簡學使釐

剔弊端務期風教修明賢才蔚起庶幾樸棧作人之意乃比來士習未端儒教罕著雖因內外臣工奉行未能盡善亦由諸生積錮已久猝難改易之故也茲特親製訓言再加警飭爾諸生其敬聽之從來學者先立品行次及文學學術事功原委有序爾諸生幼聞庭訓長列宮墻朝夕誦讀寧無講究必也躬修實踐砥礪廉隅敦孝順以事親秉忠貞以立志窮經考義無雜荒誕之談取友親師悉化驕盈之氣文章歸于淳雅毋事浮華軌度式于

規繩最防蕩軼子衿佻達自昔所譏苟行止有虧雖讀書何益若夫宅心不淑行已多愆或蜚語流言脅制官長或隱糧包訟出入公門或唆撥姦猾欺孤凌弱或招呼朋類結社要盟乃如之人名教不容鄉黨弗齒縱幸脫褫扑濫竊章縫返之於衷能無愧乎況乎鄉會科名乃掄才大典關係尤鉅士子苟有真才實學何患困不逢年顧乃標榜虛名暗通聲氣夤緣詭遇罔顧身家又或改竄鄉貫希圖進取囂凌騰沸罔利營私種種弊端深可痛

元利縣志 卷五 十一
惜且夫士子出身之始尤貴以正若茲厥初拜獻
便已作奸犯科則異時敗檢踰閑何所不至又安
望其秉公持正爲國家宣猷樹績膺後先疏附之
選哉朕用嘉惠爾等故不禁反復惓惓茲訓言頒
到爾等務各體朕心恪遵明訓一切痛加改省爭
自濯磨積行勤學以圖上進國家三年登造束帛
弓旌不特爾身自榮卽爾祖父亦增光寵矣逢時
得志寧俟他求哉若仍視爲具文玩愒弗警毀方
躍冶暴棄自甘則是爾等冥頑無知終不能率教

也旣負栽培復干咎戾王章具在朕不能爲爾等
寬矣自茲以往內而國學外而直省鄉校凡學臣
師長皆有司鐸之責者並宜傳集諸生多方董勸
以副朕懷否則職業弗修咎亦難追勿謂朕言之
不預也爾多士尚敬聽之哉

教諭廨舊在會饌堂北後廨廢卽明倫堂後事友軒
爲齋舍復廢遂移居學門右之訓導廨

訓導舊有二員因建二廨一在學門右今教諭居之
一在舊教諭廨東北從東夾道入康熙二十一年

訓導王玠捐橐三百金重建中為齋堂左右為書舍堂後接聚奎樓旁即玉帶河前後左右遍植桃柳蔚然成蹊

名宦祠舊在明倫堂後康熙二十四年巡撫湯斌毀

淫祠以其材建于聖廟之東祀唐太子中允前長

洲縣令鹽官岑仲翔 縣令蕭審 侍御史前縣

令滕遂 縣尉曲阿談戡 宋翰林學士前縣令

鉅野王禹偁 翰林學士前縣令王嘉言

禹偁子

縣令臨江劉立言 兩浙提刑前縣令鞠真卿

大理寺丞前縣令邛州常安民 中奉大夫前縣

丞永嘉項公澤 主學眉山宋楚材 元長洲令

元童 明知縣宋敏文 兵部職方員外郎前儒

學教諭廬陵周岐鳳 知縣張翔 縣丞修武劉

幹 都御史前縣令內江余金 教諭廬陵彭道

監察御史前縣令新昌俞集 知壽州前教諭

莆田林僖 延平知府前教諭京山裴椿 監察

御史前縣令濟寧李堯民 江西右參政前縣令

山陰祁承燦 縣令萊陽宋繼發

國朝禮部尚書前提督江南學政海寧許汝霖 內

閣學士兼禮部侍郎前提督江南學政磁州張榕

端 都察院左副都御史前提督江南學政古田

余正健 總督河道兵部右侍郎前蘇州知府謚

恪勤湘潭陳鵬年共二十八位

鄉賢祠舊在明倫堂後飛虹橋之北巡撫湯斌撤淫

祠之木石改建于聖廟之東與名宦祠並列祀唐

望江令鞠信陵 右補闕陸龜蒙 宋敷文閣學

士少師謚獻惠胡元質 刑部尚書黃由 秘書

少監阮登炳 著作佐郎王蘋 興化軍助教方

惟深 樞密院編修兼太學博士朱長文 元廣

平路總管輕車都尉封京兆郡侯浦源 萬戶侯

宋通 明翰林院修撰申屠衡 貴州參議尤安

禮 翰林院侍講王璣 太子太保刑部尚書俞

士悅 山西僉事劉珏 浙江道監察御史練綱

總鎮兩廣右都御史謚襄毅韓雍 禮部尚書

贈太子太保謚文定吳寬 都察院右副都御史

沈林 布政使沈杰 山西參議胡琮 温州府

知府文林 右春坊右諭德沈燾 温州府同知

程遵 鴻臚寺寺丞錢貴 都察院右副都御史

朱統 江西右參議王庭 國子監博士王敬臣

湖廣副使金世龍 通政司右通政顧九思

太子太傅兵部尚書顧其志 浙江參政袁一虬

湖廣僉事管志道 刑部郎中錢有威 和州

學正文嘉 生員私諡貞孝朱祖文 霍山縣教

諭龔元祥 廣西副使張文奇 贈禮部主事原

任上饒知縣李鴻 崇德知縣陳允堅 詹事府

少詹事贈禮部右侍郎諡文毅姚希孟 廣東參

議伍表萃 廣西道監察御史私諡孝介顧宗孟

文學私諡真文陳元素 禮部右侍郎兼東閣

大學士贈禮部尚書諡文肅文震孟 國子監祭

酒贈詹事府詹事諡文莊陳仁錫 處士沈周

兵科給事中吳适

國朝贈山陰縣知縣顧所載 廬陵縣知縣陸在新

吏部考功司員外郎顧予咸 宗人府府丞前

巡撫河南兵部右侍郎顧汧 日講起居注官翰

林院侍講彭定求天長縣學教諭張映葵

舒公祠舊在訓導廨東祀明巡按御史侯官舒汀德

其移建新學也今改于明倫堂後事友齋故址

談公祠在舒公祠後教諭廨舊基祀唐長洲縣尉談

戡

徐公祠在 聖廟東名宦祠之北祀明詹事府少詹

事徐沂康熙四十六年侍講彭定求言于大銀臺

曹寅捐金倡建與檢討潘耒協力落成又一祠在

虎邱山巡撫湯斌建今圯

彭公祠在徐公祠北祀翰林院侍講彭定求諸生以

其捐倡修學竭蹶經營者三十餘年故白諸上官

于學中建專祠

學田始於宋景定間太守陳均因民爭田不決遂撥

以養士奏上會召入朝季鏞繼為守悉以歸之俞

有元至正間郡人陸德原捐貲創建學宮又以田揆

如千畝養士然前縣志皆未言畝數明成化十年

邑人華岳捐田二十畝為月朔釋菜田在習義鄉

二十三都九畝吳寬萬歷二十五年知縣江盈科

買田一百十畝入于學三十六年大饑知縣祁承燝發帑委諸生尤挺秀賑濟餘百餘金歸縣縣以代旌額費挺秀固辭乃置上田五十畝籍于學宮嘉靖間知縣吳世良著學志云舊學田二十畝三釐一毫每年租稅二十二石二斗一升四合每年還官本折色米八石九斗六升坐落本縣亨字三畝地基一百六丈二尺居民起蓋房屋朝南三十六間每祭每間納租銀一錢五分朝西五十二間半每祭每間納租銀一錢二分五釐新學內田七

畝每年起租米七石坐落本縣利字一畝升龍橋南田十畝四分每年起租米十石四斗六升坐落本縣利字三畝學內花菓樹共二百八十三株每年約計利銀五十兩七錢四分四圍屋九十五間共二十五畝每畝起租一石居民佃住 雍正五年查明現在學田實數南三十一都二十五畝共田十八畝七分六釐五毫四十一畝共田十一畝一分七釐九毫北二十六都四十二畝共田十畝二十九都十一畝共田八十一畝七分五釐北三

十一都十五畝共田六十七畝五分四釐五毫二
十九都九畝共田五十一畝五分九釐九毫上二
十五都九畝共田五十六畝八分二釐三毫下二
十一都二十三畝共田六十四畝三分六釐四毫
二十四都一畝共田十五畝三分八釐二十四都
十二畝共田十四畝八分上二十五都十畝共田
七畝八分九釐三毫以上通共學田四百畝四分
八釐九毫每年除辦錢糧外又解學租銀八十五
兩六錢八分一釐

文星閣舊名鐘樓在學宮之東南初巡按御史符汀
改建新學形家以兌方雙塔並峙謂爲文峰巽方
亦宜高聳爲左翼以壯文明之象萬歷十五年周
中丞繼李侍御堯民陳令其志始基之又八年江
令盈科再遷今地續修者祁令承燦韓令原善許
令爾忠久之漸圯崇禎五年郡人陳仁錫文震孟
以文爲導明年涂令必昌遂捐俸成焉祀周李陳

江於閣下

陳仁錫
有記

國朝康熙間邑人彭進士瓏吳訓導愉宋贈郎中德

宏相與講學其中遂爲士子肄業之所每月朔望
集閣下會課紳士繆彤顧沂彭定求吳承勵汪銓
頻修之瓏沒弟子立嗣于西偏又祀愉于閣下祀
德宏于彭祠之南定求與諸門人計久遠乃撤舊
宇重建堂室奉三先生而合祀焉

繆彤王喆
生有記

而以

高第弟子六人侑享告之當路載在祀典六人者
彭侍讀寧求湯進士傅渠張庶常孝時張孝廉孝
揚鄭進士駟董庶常麒皆一時入室之彥文章政
事卓卓可稱者也後于弟子中復益三人一爲諸

生蔣濟選一爲諸生顧咨揆一爲學博張映葵學
行與六人相埒閣之始也因乎學宮故附志學宮
之末乾隆十七年侍郎彭啓豐倡衆重修

侍郎
有記

元和縣志卷六

壇祠

先農壇之特創也重民事也社之祭也土也稷之祭也穀也山川民所瞻仰也風雲雷雨祈豐年憂水旱也祭城隍幽有鬼神也祭厲憫無後也司牧之有專祠也功德在人宜報也鄉先生之有專祠也或尊其道德或仰其功烈或嘉其行誼所謂沒而可祭於社也棗盛醴齊或統於有司或不盡統於有司要皆得祀典之正而非

淫祀也元和新建大事宜先故彙而考之著於
篇俾有民社之責者知所崇祀志壇祠

先農壇在城內仁一畝相王巷內建於雍正五年守
土官始行祈穀也先是雍正四年八月初九日內
閣奉

上諭國以民爲本民以食爲天朕卽位以來念切民
依舉行耕藉之禮殫竭精誠爲民祈穀乃於雍正
二年三月藉田疊產嘉禾有至一莖九穗者朕心
亦以爲偶然之事今據府尹劉于義進呈今歲藉

田所產自一莖雙穗三穗以至八穗九穗皆碩大
堅好異於常時朕見之心甚慰悅特令宣示廷臣
朕並非以此爲祥瑞誇耀於衆也蓋實有見於天
人感召之理捷于影響無纖毫之或爽朕以至誠
肫懇之心每歲躬耕藉田以重農事卽蒙

上帝降鑒疊產嘉禾以昭休應似此八穗九穗之穀豈
人力之所能強爲亦豈人君所能強之使有乎天
人感應之理朕見之最真最切但恐此心不誠耳
誠則未有不動者卽如從前青海蠢動朕爲邊陲

憂慮虔禱宮中不數旬而捷音卽至疆圉寧謐又如前歲夏間近畿雨澤稍愆朕在宮中默禱減膳脩省虔誠叩懇不數日而甘霖大沛禾稼有秋此皆近年以來朕親行親驗之事至於去年夏秋之間時常陰雨朕在宮中但覺雨水稍多不知其大爲民患而李維鈞並不將畿輔被潦實情具奏是以朕竟不聞知未曾早爲虔禱殫竭誠心以挽天意而紓民困及蔡珽署直隸總督事務詳細奏聞朕宵旰憂勤幾廢寢食於是截漕發倉多方賑濟京

城設厰各邑興工俾窮民皆得餬口是以地方雖被水災而小民不致流離失所朕撫綏憫恤之念實爲迫切今歲二麥豐收禾黍暢茂此皆

上天俯鑒朕衷故加惠黎元而錫以盈寧之慶也蓋天生民而立之君鑒觀在上人君一念敬謹政事無闕天必嘉之佑之一念放逸政事有乖天必儆之戒之此一定之理也况人君撫馭臣庶位處極尊所以賞罰之者獨有

上天耳是以朕每於水旱等事皆實心內省必係朕有

元和縣志 卷六
過失

上天儆戒示譴也至於各省旱潦之事朕皆視同一體原無彼此之別惟是地方相隔路遠彼地偶有水旱有司未必卽行具報及至奏達朕前而緊急之時已過是以朕無從盡其誠心爲之祈禱此其責則全在本省督撫矣督撫受朕委任之重爲朕養育萬民必視百姓之疾苦如痛癢之在己身一遇水旱飢饉必思所以致此之由或因本省之政事吏治有闕卽思速爲改易之或因本地之人心風

俗不端卽思速爲化導之兢兢業業脩省祈禱竭盡誠心一如朕之朝乾夕惕斷無不可以挽回

天意者假若聞朕之政治稍有缺失亦卽直言陳奏不必隱諱如此則官與民聯爲一體臣與君又聯爲一體太和翔洽實意交孚天聽雖高誠呼吸可通矣朕每歲躬耕藉田並非崇尚虛文以爲觀美實是敬天勤民之至意禮曰天子爲藉千畝諸侯百畝據此則耕藉之禮亦可通於臣下矣朕意欲令地方守土之官俱行耕藉之禮使知稼穡之艱難

悉農民之作苦量天時之晴雨察地方之肥磽如此則凡爲官者皆時存重農勸稼之心凡爲農者亦斷無苟安怠惰之習似與養民務本之道大有裨益着九卿詳議具奏欽此臣等公同伏讀上諭欽惟我

皇上至德同天深仁育物朝乾夕惕時時以四海爲心旰食宵衣念念恐一夫失所肫誠昭格於

上帝恩膏遍及於羣黎是以虔禱宸宮而邊陲之捷音卽至默祝

大內而寰宇之甘雨覃敷響應昭然纖毫不爽誠如聖諭所云天聽雖高呼吸可通者也至於截漕發倉近畿無虞荒歉興工設厰窮民盡獲安全是天地生成之功固無弗至而

皇上懷保之德實靡不周保合太和參贊化育運四海於一心視九州爲一體在昔所稱聖君哲后難與比隆卽古所謂盛世昌期孰能媲美我

皇上聖不自聖安愈求安念國以民爲本民以食爲天躬親胼胝之勞歲行耕藉之典是以嘉禾疊產

九穗頻生異瑞竒徵駢臻協應况今歲百穀暢茂
二麥豐收閭閻獲樂利之休百室有盈寧之慶何
一非

皇上至誠格

天之所致也今後令耕藉之禮通於臣下欲地方守土
之官俱行耕藉之典使知稼穡艱難農民作苦天
時晴雨地方肥磽仰見我

皇上敬

天勤民重農務本之至意有加無已洵從古未有之曠

舉萬世不易之良規卽宜恪遵

上諭通行奉天直隸各省舉行耕藉之典查督撫係
通省大吏府州縣衛所等官皆有守土之責相應
行文奉天府府尹直隸各省督撫轉行各府州縣
衛所於各該地方擇潔淨之地照九卿所耕藉田
四畝九分之數設立先農壇於雍正五年爲始每
歲仲春亥日府尹督撫及府州縣衛所等官率所
屬之員耆老農夫恭祭先農之神照九卿耕藉之
例行九推之禮務須實心奉行以重民依其設立

先農壇並恭祭先農俱令動支正項錢糧其所用
數目各該地方官報明戶部查核藉田所收之米
粟敬謹收貯以供各該處祭祀之粢盛將各處設
立藉田畝數令該撫報明戶禮二部存案庶爲官
者皆以重農課稼爲心則爲農者自無苟安怠惰
之習於國計民生大有裨益矣隨經通行至元和
縣雍正五年建先農壇於相王巷南置天字圩壹
百九十坵官田二畝二分二厘八毫又四百九十
一坵官田三畝共五畝二分二厘八毫略浮於部

頒定額四畝九分之數

此元和得建先農壇之始

乾隆三年知縣事張若熾因舊制卑隘不稱且前
此經營苟簡修役不時迺卽先農壇故基詳 憲
改築牆之土者易以瓦階之傾者甃以石殿宇簷
楹之爲風雨所侵損者塗墍丹雘崇飾一新又移
建牌坊一座頭門三間正殿兩旁重構造配房二
間鳩工庀材共費朱提九十八兩有奇經始於是
年之七月初一日卽於是秋八月初八日告竣是
役也因舊增新不獨規模式廓而工力亦視昔較

爲完固庶可肅觀瞻而虔祀事焉

社稷壇在吳縣閭門外義慈巷實府社稷壇也宋置子城西南四里元遷盤門外明洪武三年知府陳寧更建於長洲縣石牌巷宣德八年知府况鍾移至今所

國朝因之長吳附郭宋元時各有壇今與元和皆統祭於府壇制累石爲之縱橫俱三丈高四尺二寸凡三階階三級前設拜壇高尺許東西三丈六尺南北二丈四尺壇之西南爲神厨正南爲宰牲房

房之前爲水池府齋房二所縣齋房二所東西糊峙壇之內垣東西三十五步南北三十三步四面皆塗丹外垣深六十四步廣六十二步門北出大門一儀門三亦俱塗以丹石主二一埋壇南正中一卧於地長四尺二寸徑一尺二寸神牌二高三尺三寸題曰府社之神府稷之神每歲春秋仲月上戊日三縣隨府官具祭如禮

風雲雷雨境內山川城隍壇亦府壇也在吳縣盤門外宋置吳縣治西南四里元徙長洲縣葑門外明

洪武間移置今所壇制亦累石爲之東西三丈六尺南北三丈七尺高四尺二寸四面有堦堦三級壇之東北爲宰牲房房之前爲水池又前爲庫房壇之東南爲府齋房西南爲縣齋房壇之內垣東西三十五步南北三十六步四周俱塗丹外繚短垣基凡二十四步前門一儀門三亦塗以丹春秋擇日同壇設三神位各高三尺三寸題曰風雲雷雨之神山川之神城隍之神舊制府官主祭三縣陪祀雍正十年三月初九日欽奉

世宗憲皇帝諭旨行令直省府州縣修理

社稷風雲

雷雨山川城隍等壇以重祀典至

今上乾隆二年十一月初六日禮部遵

旨議覆社稷山川風雲雷雨等壇嗣後每逢祭期省會之地督撫將軍都統副都統率令司道文武屬員各按品級分班行禮布政司係地方正印官仍令主祭其府州縣地方如有提鎮道員亦令各按品級分班行禮府州縣正印官仍令主祭又行令郡邑各壇應行修理者支動正帑估報核修至各

元和縣志 卷六 九
壇祭器有制造未備以及歲久損壞者并遵照會
典如式修造於是蘇郡三縣合祀諸壇次第及時
修整春秋屆祀大中丞率屬行禮駿奔有恪秩祀
加隆於昔矣

厲壇在元和縣九都虎邱山寺右旁實郡厲壇也長
洲舊有邑厲壇在白蓮橋後廢因與吳縣附祭於
郡今元和亦如之累石爲壇縱橫各三丈高四尺
每歲春清明日秋七月望冬十月朔以儀從迎府
縣城隍神至請

欽依祭文祭闔郡無祀鬼神府官主祭三縣官陪祀
鄉厲壇祭各鄉無祀鬼舊制每一里建一壇俗呼孤
魂壇歲清明七月望十月朔各里設祭壇高三尺
樹以松楸立碑其上周圍繚垣門一長洲縣舊有
七百四十一所若與元和分祀當不下數百所也
今皆湮廢爲民居所侵屋其上者十九僅存者亦
鞠爲茂草矣澤及枯骨此典宜興復焉

城隍廟在蕭家巷雍正四年八月里民張品倫等謂
元和旣分縣陰陽一理應添設縣城隍司以昭祀

典鳳池鄉舊有土穀張明廟乃漢朝名將也卽以兼理城隍爲宜知縣江之煒聞於府復與舉人生員等議僉以城隍當祀而他神兼攝爲非宜移張神於左之便殿而以正殿立元和城隍神像署其門曰元和縣城隍之廟似屬妥洽因詳之上官皆報可遂以其年十二月二十七日設像成禮焉

赤蘭相王廟在葑門內仁一畝土穀神也吳地紀云神爲南面討擊將軍黑莫郝屬敬王時築城而死人呼赤蘭將軍亦呼相王或云赤蘭卽赤門之譌

相王卽伍相云

靈濟白龍廟在長洲縣陽山澄照寺其祀事元和主之相傳東晉隆安中繆氏室女產龍驚悸而死鄉人厚葬之號曰龍塚每歲是日龍必歸省母宋以祈雨應屢封龍忠烈昭應廣惠靈豐公母顯正孚順聖善妃載於祀典春秋祀之

宋胡偉元胡應皆有碑記

澹臺滅明祠在尹山麓後移建山上

亞聖祠在東禪寺西祀孟夫子並祀孟母舊在顧家巷五十三世孫松江府判官孟潼宋昭慈后姪孫

也以祖信安郡王孟忠厚鎮吳有功請於有司改立爲祠剏性善家塾以教俗黨子森集守之後廢明萬歷中移建今處康熙間糧道劉鼎助修

韓將軍廟在婁門官瀆橋將軍名說漢人爲橫海將軍與朱買臣同受詔在吳中治樓船破東越有功故祀之

朱氏忠孝祠在亞聖祠東祀漢尚書朱穆唐洗馬朱仁軌

二戴夫子祠在虎邱山東祀漢信都太傅戴德博士戴聖二公剛定禮經有功聖學康熙二十六年督學李振裕建祠

顧元公廟祀晉驃騎將軍顧榮在黃天蕩東有墓焉故名其地曰顧榮墓祠久圯元至正間邑令周舜

臣更新之

周伯琦有記

東山短薄祠在虎邱山門內祀晉司徒王珣珣與弟珉捨別業爲寺今皆爲土神顏曰故東山廟

西山廟在虎邱山門外萬點橋西祀晉司徒王珉五賢祠在虎邱山明萬歷戊戌邑令江盈科卽平遠

堂建祠祀唐太僕少卿兼御史中丞韋應物太子
太傅刑部尚書贈尚書右僕射諡文敏白居易太
子賓客檢校禮部尚書贈戶部尚書劉禹錫宋翰
林學士知蘄州王禹偁前禮部尚書兼端明殿翰
林院侍讀學士贈太師諡文忠蘇軾以韋白劉俱
刺吳郡王宰長洲蘇則晚年寓吳也

歸宣公祠在葑門仁三畝給諫坊內公諱崇敬唐大
歷中翰林學士兵部尚書封餘姚郡公諡宣子登
累官工部尚書封長洲縣男諡憲父子有聲於朝

祀宣公而以憲公配焉明嘉靖間裔孫歸大道重
修

甫里先生祠祀唐高士陸龜蒙也祠在縣東五十里
甫里白蓮寺卽其故宅或云卒後葬其旁遂廟食
焉宋嘉定十七年錢塘龔時備別建祠於左

胡宿有碑

銘元元統時裔孫德原卽是地請建書院有宣聖

殿明倫堂大小學二齋儼然學宮規制旋設山長

以教來學

戴良有送甫里書院下山長序

至正間縣尹馬玉麟重

建養鴨池桂子軒日久漸圯汎營居其中康熙甲

子睢州湯斌撫吳崇尚正學於是甫里人士得奉
憲檄撤而新之蔚然復舊觀焉

魏諫議祠祀宋諫議大夫知州事魏庠至道中奏改
虎邱律寺為雲巖禪寺因為建祠

王翰林祠祀宋翰林學士知蘄州前長洲令王禹偁
天禧四年子嘉言復宰長洲作堂祀之後移堂於

虎邱刊蘇文忠贊於其中

知州康孝
基撰碑

孫學士祠在萬壽寺宋天聖中直史館臨江孫冕守
郡有善政吏民立祠祀之今改為縣學久廢

章莊敏公祠在報恩寺東即宋章太師案家廟公在

涇原禦夏有功徽宗賜廟於懷德軍額曰忠烈嘉
定末其孫請立於此今為天妃宮

周濂溪先生祠在忠烈祠西絃歌里祀宋周茂叔先
生也初先生四世孫興裔以和州觀察使駐節平

江奏立祠於吳縣胥臺鄉其裔孫文英南老自道
州來因家焉祠屢復而卒廢明正統間十四世孫

淵等遷於家顏其堂曰崇本

大學士
王真記萬歷中十七

世孫與爵復建專祠前堂祀先生後堂祀先生父

以武功大夫興裔配萬歷末十八世孫希夔復建於絃歌里以裔孫制機檢察使才秘書省檢閱文

字璵耐焉

大學士申時行記

春秋編祭長洲

二程夫子祠祀宋大儒明道伊川二先生也祠舊在府學西高宗時伊川從子沂知崑山縣因故廣平侯程師孟宅建後燬順治十七年府學教授程邑重建於飲馬橋北康熙九年少司空程文彛時官庶常以祠址逼隘買地虎邱而移建焉後堂祀先生之父大中公諸生程端程永祚等又於祠後別

立一室祀先生遠祖晉新安太守元譚陳雲感

軍靈洗散騎常侍文季唐歙州都知兵馬使漢

三賢祠在西嶺祀宋范文正公仲淹胡安定先生瑗

尹和靖先生焯嘉靖間吳文端公一鵬建

湛文簡公若水

有記

尹和靖祠祀宋儒尹肅公焯初在虎邱西庵公讀書處也嘗自題其齋曰三畏嘉定七年士人黃士毅請於郡守陳帝通守丁焞繪像祀之後二年貳卿孟猷改建於上方通幽軒之南端平二年胡淳請

卽其地爲學倉司曹園因奏立書院設四齋曰三省務本朋來時習提舉馬述建君子堂嘉熙四年提舉陳振孫作藏書室咸淳初提舉李芾建蒸居堂奉先聖元初爲雲岩寺僧所據延祐元年移烏鵲橋北郡守道童重建殿廡門堂後廢吳令汪巨以公祠宜在虎邱仍於西庵故址重建和靖書院三楊公祠在虎邱二山門外一名道南書院祀宋龜山楊先生時明少保兵部尚書莊簡公成崇禎庚午解元忠文先生廷樞康熙六十年布政使楊朝

麟建莊簡公有祠在黃鸝坊巷崇禎五年巡撫莊

祖誨建十一年巡撫張國維以莊簡公子端孝先

生大滌配享乾隆三年祀生楊柱峯請祭重修并編祭焉

樂園書院在城內地三畝祀宋先賢太學博士朱長

文賢嗣進士朱發配享公沒於元符元年弟子范

純仁等建明教堂祀之寶祐三年敕建樂園書院

元燬於兵燹明太祖時新之歲久傾圮康熙己亥

有司以慈濟廢庵改建西傍有忠節祠祀宋海鹽

尉朱良東傍有孝友祠祀旌表孝子朱之勸乾

隆二年給帑修巡撫邵基記三十年閏二月二十六日

皇上南巡御書道園養素匾額奉文防護祠宇增輝

盛御史祠在婁門祀明御史盛景

康都官祠在虎邱山祀宋康孝基

蔣學士祠祀宋樞密學士左諫議大夫知州事蔣堂

在虎邱山

原朝散祠祀宋朝散大夫行在尚書吏部員外郎知

州事閩州陳省華

葉少列祠祀宋朝散大夫刑部郎中知州事葉參

姚秘閣祠祀宋右朝散郎直秘閣兩浙路轉運判官

郡守姚憲姑蘇志云已上三祠並在虎邱雲巖

寺乾道五年郡人立教授陳伯今廢按葉少列祠在干頃雲之

東嘉靖初郡守胡纘宗重建

南山書院宋宗室趙忠果公故祠也公名訓之為吳

令多惠政後知永豐遇統制杜彥叛拒戰以歿子

貴一卜築橫谿彩雲里士庶不忘忠果舊澤就所

居構書院祀之明萬歷間督學御史柯挺按吳重

其裔孫鳳風節造廬訪謁詢所欲鳳愀然以先祠

毀於兵燹對卽為新之

少師申時行有記

延平李先生祠在婁門祀宋儒李靖公侗也自公四世孫大昌徙居吳郡至明永樂四年士民仰慕儀型建祠於縣治東後廢康熙二十八年十八世孫堯欽捐資修婁門內社學巡撫洪之傑撤淫祠改建

劉文靖公祠祀宋儒劉屏山先生子翬也公為宋太師忠顯公韜之季子少傅忠定公子羽之弟文公朱子之師閩之崇安人以六世孫靖節公順之歷

平江權茶提舉遂籍於蘇因有專祠年久傾頽康熙二十五年學使李振裕改建於貞三畝李基巷以靖節配享

總管廟在葑門外匠門塘西祀汴人金和和隨駕南渡僑居於吳其子名細官太尉沒皆為神細在理宗朝嘗著靈異遂封靈祐侯侯之子昌昌子元士復皆為神元至正間嘗陰翊海運俱封總管又進封昌為洪濟侯元士為利濟侯

張忠靖祠在師林寺家廟內祀宋浙西帥幹兼樞密

院提刑張日明

都南張公祠在乘鯉坊東祀宋平江路通判贈節度使張日中橫渠先生七世孫建昌軍南城人端宗朝任平江倡義衛民政績大著尋遷興化軍時文信國公開府勤王率師以應復吉贛等州信國公師潰公奮力拒戰元李恆麾鐵騎橫擊公身受數創猶刃十餘人被執死信國哭之有絕域耻爲吳地辱封疆甘作宋臣忠之句事聞配祀祖忠敏公其子洛居吳因世享崇禎闢以裔孫工部郎中

保定知府祝福清知縣朝儀饒州通判慕渠四賢配享祠圮改建於吳縣南狀元坊

忠烈祠在乘鯉坊祀宋丞相信國公文天祥公知平江時詔天下勤王遂入衛後還平江吳城已爲元有感憤悲悼慰撫遺民而去治吳雖不久而惠之在吳終古不可沒也明初未有專祠正德十年裔孫太僕少卿文森願以其地立祠奉祀巡按謝琛以聞詔賜廟額曰忠烈嘉靖二十六年長洲學宮旣遷郡守金城以公祠湫隘不稱議改舊學爲祠

三利縣志 卷六
巡按饒天民以聞詔復可之族孫待詔徵明爲書
正氣歌於壁萬歷間祠漸圯邑令陳其志胡士容
相繼修葺康熙庚戌後裔世光又新之乙丑巡撫
湯文正公斌以公裔孫待詔徵明大學士震孟配
享己丑巡撫于公準率屬重葺

世宗憲皇帝七年詔修古聖賢祠墓公祠得邀盛典

今上御極復降

諭旨修葺鳩工於乾隆二年訖工於乾隆三年迨後殿
宇復又傾圯乾隆二十四年裔孫朝節捐資重修

學政李因培記乾隆三十年閏二月二十六日

皇上南巡御書正氣成仁匾額賜祠供奉俎豆增光

周孝子廟在城中東南隅孝子名容常熟人事母有
至行人稱爲周孝子沒爲神能保護鄉間有驅虎
除蝗救水旱攘盜賊諸顯跡宋淳熙間賜額曰靈
惠祈禱接踵廟廷隘不能容成化七年里人王英
募衛千戶陳俊割地以廣其址廟制始備旁浚井

病者汲井投紫蘇煎飲卽瘥

禮部尚書吳寬有記

許文正公祠在甫里祀元儒魯齋先生許衡明初建

嘉靖間燬於倭康熙八年裔孫王儼重建

原魯先生祠在婁門報恩寺東先生顧姓名愚元末

隱居不仕以伊洛之學倡里中學者翕然宗之孫

存仁中明嘉靖間進士官禮科給事以直諫謫戍

居庸後還職卒贈太僕卿先是郡守金城建祠吳

縣卧佛寺東後督學耿定向移建大石鍾繼英復

建婁門以太僕卿配

周琬有記

開平忠武王祠祀明鄂國公追封開平王諡忠武常

遇春吳元年開平受命討張士誠將圍平江駐虎

邱寺得免兵燹因爲立祠今廢

四賢祠在虎邱白蓮池旁祀明夏忠靖公原吉周文

襄公忱王端毅公恕海忠介公瑞皆撫吳有功德

於民者

五經陳公祠在縣橋巷祀明翰林檢討陳繼繼有孝

行貫穿經學人呼爲陳五經楊士奇薦爲國子博

士尋改翰林

周文襄公祠祀明工部右侍郎巡撫江南廬陵周忱

在虎邱法堂後公撫吳十九年奏減糧額七十餘

萬吳人德之爲畫像立祠

孔侍郎祠在東花橋巷祀明兵部左侍郎贈尚書鏞

乾隆二十三年後裔孔毓義移建支硎山四圍浜

陳大中丞祠在丁香巷祀明都察院左副都御史操

江陳璿

吳文定公祠在天賜莊祀明太子太保禮部尚書吳

寬

沈大中丞祠在葑門外官浦祀明都察院右副都御

史沈林

徐公祠在韓蘄王廟東祀明大中丞徐源

朱恭靖祠舊在北濠今移虎邱二山門祀明太子太

保吏部尚書朱希周

周巡撫祠舊在胥門驛右今移虎邱二山門祀應天

巡撫周孔教與朱恭靖祠合祭

侍御陳公祠在虎邱寺內東偏侍御名瑞福建人明

嘉靖二十四年來按吳風裁中多甘雨之惠復任

一載去後民多思之爲立生祠

申文定公祠祀明少師大學士申時行在虎邱第三

泉之右專祠在城中

朱秋崖祠在文忠烈祠西祀明都御史開府浙閩朱

統嘉靖三十三年巡撫張景賢建給田一百四十

餘畝以供祀事俾其子正元世守焉今移學宮東

文待詔祠祀明翰林院待詔文徵明在文忠烈祠內

顧太保祠在舊學前醉竹祠祀明三邊總督顧其志

顧孝介祠在天賜庄祀明監察御史顧宗孟

鄧孝子祠在婁門張香橋祀明孝子鄧汝甫

陳仁錫有記

三講官祠在虎邱二山門竹亭東祀明東閣大學士

文文肅公震孟魯事府少詹姚文毅公希孟國子

監祭酒陳文莊公仁錫文肅別配享忠烈祠

葉公祠在帶城橋西祀明御史天啓間邑令葉成章

康熙十一年改爲雙清書院合祀邑令沈恩舉二

公皆閩產均令長洲善政亦相類故並祀之

五人祠在山塘祀顏佩韋馬傑楊念如沈揚周文元

詳見冢墓

許公祠在六直鎮祀明中書許自昌

吳公祖孫合祠在仁三畝祀明太僕吳之佳兵科給

事吳适

忠孝龔公祠在平江路中營基巷祀明殉難贈助教

龔元祥孝子龔炳衡

張公祠在虎邱白公堤祀明巡撫玉筍張國維崇禎

甲戌撫吳在任七年惠澤覃被庚辰去任士民德

之建祠

忠烈王公祠在大儒坊巷祀明殉難保城知縣王佐

聖

正心書院在虎邱山前斟酌橋西明崇禎十六年吳

邑令牛若麟捐資建中堂奉先賢周程十子後為

學舍又後為樓額曰正修講院去後士民思之於

後樓奉生位祀焉見史官徐汧去思碑記鼎革時

學舍傾圮巡撫馬祐更額正心書院

孝廉鄭敷教題進士趙炳

書

蔡忠襄公祠在虎邱古鶴澗邊康熙二十五年建祀

明山西殉難巡撫蔡懋德

萊陽二姜先生祠祀明給諫姜如農暨弟吏部如須

給諫名琛以言事廷杖謫宣城國變不果行卒治

命葬敬亭山下吏部名垓葬蘇州祠在養鶴澗旁
宋文恪公祠在虎邱二山門祀文華殿大學士宋德
宣

方公祠在虎邱金粟房祀分守蘇松常道方國棟

吳郡守祠在虎邱清和書院祀蘇州知府吳道煌

蔣公祠祀戊戌科進士蔣德峻祠在甫里以其恬澹

不仕有魯望風也又棄田宅施糜粥建橋梁里黨

德之建祠與甫里祠相對

顧孝靖祠在山塘白公堤祀贈河南巡撫

賜御書孝靖匾額孝子顧天朗子宗人府府丞沂從
祀

韓宗伯祠在縣東北祀禮部尚書韓茨祠前帶水俗

名狀元浜有塔影入河隨時隱見公未第時卽于

此教其鄉及掇大魁鄉人以爲靈秀所鍾給假家

居從遊者極一時之寒雋後卒宦邸諸生請于官

特建專祠有司以時祭祀祠內懸

聖祖仁皇帝特賜潤色鴻業匾額

汪公祠舊在虎邱二山門圯廢移祭堯峰山墓所祀

本朝翰林院編修汪琬

張孝廉祠在儒學東孝廉名慶孫以文行知名祀鄉

賢子大受官翰林院檢討建祠宅南宋太宰犖題

其堂曰履素學者私諡曰履素先生

七姬廟在賽金巷七人皆元末左丞潘元紹側室也

程氏年三十翟氏徐氏年二十三羅氏卞氏彭氏

年二十二段氏年十八敵臨境七人同日皆自經

死詳元張羽權厝志

三節婦祠在葑門外祀旌表節婦蔡氏姜氏董氏萬

歷戊戌年里人陳詩建詩請于縣免祠基稅糧

知縣

江盈科撰傳史羊生作記康熙戊子周稼重修乾隆辛巳稼孫周懷仁再修

貞節祠在給諫坊耐唐歸宣公祠宣公裔孫文達早

卒妻陳氏教子守節順治十六年旌表建坊

怡賢親王祠在虎邱山塘雍正八年建

以上祠宇皆在元和境而祀事則不盡統於元

和有祭自長吳者亦有其子孫自祭者

禹王廟在吳縣柳巷

先賢鄭子祠在吉由巷祀孔子弟子鄭國字子徒唐

贈滎陽伯宋加封胸山侯明改稱先賢鄭子

王子祠在甫里祀隋文中通後裔王竹溪世守

伍相國祠在胥門內朱家園祀伍行人員祠舊建盤

門內宋建中靖國元年直秘閣吳儼舉知蘓州奏

請賜額英烈元大德三年增爲忠孝感惠顯聖王

明成化十五年廟燬巡按劉魁知府劉瑀重建萬

歷四十年裔孫叅議伍袁萃移置今所年久傾圮

國朝康熙五十六年裔孫伍大鈞捐資倡族重建

胡安定公祠在府學范文正公旣舍宅爲學給田五

頃以贍學徒延安定胡先生瑗主教事故後人於

學中置專祠

宋文公祠在吳縣十廟前巡撫趙士麟廢十廟改建

張宣公祠在吳縣祀宋大儒南軒先生棧

胡公祠在金閶祀宋太常博士胡則

沈尚書祠在青龍橋祀唐吏部尚書沈傳師

范文穆公祠在茶磨山祀宋參知政事范成大其地

卽公別墅也明正德間侍御盧雍建祠以孝宗手

書碑石嵌諸壁

王鏊有記

後圮萬歷四十年重建崇禎

十二年巡撫張國維修

徐晉寧侯祠在郡學東祀宋蘇州通判徐奭

張太傅祠在大營門祀宋樞密使前知平江府張世傑

朱司農祠在干將坊東祀宋孝子朱壽昌

劉靖節祠在干將坊巷祀明洪武舉人劉政萬歷初

詔建

韓襄毅公祠在府學東祀明兩廣總制韓雍嘉靖二

十三年巡按御史昌光洵立祠

錄功祠在府城隍廟西祀明兵備副使贈光祿卿任

環嘉靖時倭寇掠蘇境時公爲府同知負創披堅

設伏制勝盡殲之朝廷嘉其功三十九年敕建

敕建節孝祠在子城基合祀元長二縣節孝婦女雍

正元年建

袁公祠在府城隍廟西芥隱書院明吏部尚書袁安

節公世祠也漢司徒公安晉吳國內史忠介公崧

宋京西提刑襄簡公珣工部侍郎忠愍公樞舊各

有祠後廢皆移祭書院

袁六俊祠在醋坊橋祀明別駕袁表國子生袁駿員外袁袞贈廉使袁袞刑部主事袁袞貢士袁袞兄弟六人皆以文行知名吳中稱曰六俊康熙二十五年曾孫士俊請於督撫學三院飭建專祠

馬公祠在子城基東天王堂祀

本朝巡撫馬清恪公祐祐撫吳多善政卒於官士民建坊請祀

于公專祠在西天王堂祀兩江總督于清端公成龍公以勞卒官士民公建後孫準巡撫江南又建府

學與湯公祠相並名二賢祠乾隆十五年元和學訓導吳中衡捐資重葺清出祔田以供香火

湯公祠在府學明倫堂西祀江蘇巡撫謚文正湯斌貞烈祠在吳縣大營門祀張應奎聘室沈氏崇禎間題旌建祠

以上祠在他邑編祭並及元和故附志之

先賢臨濮侯施之常祠在雙塔寺東從社壇移建

宋三賢祠在仁壽里祀朝議大夫孫載大理寺評事孫臨朝散郎孫察裔孫明蘇州通判理祔

丁叅議元復祠在丁香巷

韓公祠在山塘祀江蘇巡撫韓世琦祠久廢乾隆十

九年沈尚書德潛請於巡撫莊有恭清出修建

孫誠孝祠在仁壽里祀明孝子孫永正

知府黃鶴鳴記

蔣叅議祠在山塘祀明兵備道蔣燦

二周先生合祠在長洲學東南地三畝祀明孝子周

尚賢追祀宋道國元公周惇願從葑門外姚馬里

移建 兵部尚書彭啓豐記

忠義孝悌祠在 文廟東雍正元年

詔建祀宋朱良明盛昶劉政龔元祥徐謙王光裕龔

炳衡周尚賢盛王贊鄧汝南徐道王文祿孫永正

本朝歸聖脉顧天朗程大儒朱之勳李漢孫鼎鐘邱

存禮程文煥黃農盛建極孫豐穀施濛張文魁徐

國楮顧惟灝楊成懋吳中英

以上建在康熙雍正間前志失載及乾隆間移

建清出者

鄧公祠在 聖廟東忠孝祠北祀明封寧河王賜謚

武順鄧愈祭編長邑舊祠在唯亭圯廢乾隆二十

六年訓導李良弼創建有記

文仁孝祠在忠烈祠西旁祀孝子文齡

雙節祠在長壽菴內祀明節婦王氏陸氏

顧貞孝祠在花谿南祀明貢士顧國本

沈氏宗祠在葑門外竹墩禮部尚書沈德潛建以祀

湖州分支諸祖及贈內閣學士國學世烈贈內閣

學士文學欽圻贈內閣學士鍾彥內有 誥封

三代墓表 御賜詩壇耆碩匾額

唐孝子祠在虎邱山塘祀 旌表 子唐肇虞 裔孫

員外郎文棟助義田五百畝贍族

江孝子祠在十房莊祀孝子江國正 子鉉置產贍族

節孝祠在桐橋祀禮部儒士貝啟祚節婦程氏曾孫

紹溥建

周介孝祠在仁孝里祀孝子維億 學博李良弼記

以上新建者

元和縣志卷之六

